

Date – 16/08/2025

Time - 18:30 -18:40Hrs

AKASHVANI AIZAWL

REGIONAL NEWS BULLETIN

HEADLINES (EVENING)

1. Mizoram chakkhai lakluhna kawngpui chhiain a nghawng, nitin mamawh leh bungraw hrang hrang harsatna chuan ziaawm lam a pan tawh a, ngai la awh chiah lo mah se Aizawlah chuan harsatna lian tham a awm tawh lo.
2. Land Revenue and Settlement Department Minister Pu B Lalchhanzova enkawl department chuan chak leh zuala hmalak an tum tih an sawi a, online hmangin mahni ram chin chiang taka en theih turin an buatsaih tih an sawi.
3. Jammu & Kashmir-a Ningani kaltaa ruah bawhawk sur vanga chhiatna thlenna, Kishtwar dist-a Chisoti khuaah chhawmdawl hna ngawrh taka thawh zel a ni.
4. Pakistan ramchhung hmar lamah darkar 48 kalta chhung khan ruahsur nasa kaihhnawihah mi 320 chuang an thi.

<><><>

SUPPLY

Mizoram chakkhai lakluhna kawngpui chhia in a nghawng, nitin mamawh leh bungraw hrang hrang harsatna chuan ziaawm lam a pan tawh a, ngai la awh chiah lo mah se Aizawlah chuan harsatna lian tham a awm tawh lo.

Akashvani Palai chuan vawiin khan Aizawl khawpui dawrte a tlawh kual a, nitin eichawp dawr ten bungrua an nei tha leh tawh a, an duhthusam ang takin bungrua la thleng vek lo mah se ngai an awh leh tan tawh a ni.

Kar hmasa khan kan palai chuan Aizawl khawpui dawr chungchang hi a lo zirchiang tawh a, nitin mamawh kawngah harsatna a tam hle, kar khat hnuah erawh ziaawm lam a pan tawh. Insakna bungrua pawh a thleng leh thei tawh a, mi thenkhatin a man to a Cement an hralh pawh vawiin kha chuan a man pangngai in an hralh leh thei tawh a ni.

Tuialhthei chungchangah pawh harsatna a awm tawh rih lem lo a, khawpui lailia Filling Station te chuan a duh apiang tan an pe chhuak thei leh tawh. Aizawl bawrhsap Pu Lalhriatpuia'n dan loa petrol leh diesel zawrh khapna thupek a chhuah erawh chuan zawm a la hlawh lem lo a, kawng sirah langsar tak taka zuar hmuh tur an la awm a ni.

Eichawp leh mamawh dang a thlen that lai hian bawngnhnute harsatna erawh a la ziaawm thei lutuk rih lo thung. Akashvani Aizawl zawhna chhangin Bawngnhnute chikhat Verka Distributor Pu F. Lalrodinga chuan, kawng chhia vangin kalkawngah hun hman chhung a la rei a, chu chuan nghawng a la nei tih a sawi.

<><><>

DMR MINISTER

Disaster Management & Rehabilitation Minister Prof. Lalnilarma chuan nimin khan Lawngtlai Chandmary leh Bazar venga May thla tawpa In chimna leh Lawngtlai-III a lei tlahniam chu a hmunah kalin a enfiah a. Minister hi VC leh YLA hruaituten an lo dawngsawng

Prof. Lalnilarma chuan kumin May ni 30 zan a ruahsur nasa avanga Chandmary leh Bazar Venga chenna In chan tate chu thinlung takin a tawrhpu tih a sawi a. Building chim avanga tangte him dam taka lakchhuah vek an ni chu lawmawm tiin, chhanchhuah hna thawktute an fakawm tak zet a ti. DM& R Minister chuan sawrkarin an harsatna tawh a hriatpui tih sawiin, theih ang ang a hmalak a nih thu a sawi.

Lawngtlai - III lei tlahniam a tlawhnaah Minister chuan an harsatna tawh a lo hriat tawh thu a sawi a. Lei tlahniamin a huam chin a zau avangin sum leh pai tam zawk sen a ngai dawn tiin, sawrkar laipui hnenah tanpuina sum tam zawk hmu tura hmalak mek a ni, a ti.

Prof. Lalnilarma hian Lairam Rescue Centre - a tlawh baw a. Ruihhlo ngaite chhanchhuak tura an inpekna fakawm a tih thu a sawi a. Ram leh hnam tana an rawngbawl na ropui a tih thu sawiin, tha hnemngai taka thawk zel turin a ngen. Lairam Rescue Centre-in mamawh an neih hrang hrangte a enfiah nghal a. Tun dinhmuna an mamawh em em tui thianghlim khawl na tur (Tanky) leh Retaining Wall-te chu ngaihpawimawh hmasak a tul hle a ti a. PHED leh DM&R lam atanga tanpuina awm thei ang angte lo bawhzui a nih tur thu a sawi .

Prof. Lalnilarma chuan Lairam Rescue Centre - hnenah hian tanpuina cheng 10,000 a hlan nghal a ni.

<><><>

CHAWNGTLAI TOMATO

Chawngtlai khua chuan tunhnai thla 3 chhungin tomato quintal 976 leh kg 81 an thar chhuak.

Chawngtlai Tomato Grower's Association Secretary Pu R Biakhminglana sawi danin kumin May atanga July thla chhung khan tomato quintal 976 leh kg81 qtls an hralh a, tomato hi grade hnihah then niin, Grade A – quintal 864 leh Grade B – quintal 112 hralh chhuah a ni a, tomato hralhna atang hian cheng nuai 42 chuang an la lut tawh a, Kumina tomato an hralhna rate hi a hniam lai berin kg khat cheng 40/- niin a san lai berin cheng 80/- a ni.

Tun dinhmunah Chawngtlai khuaa tomato ching chhungkaw zingah hian Chawngtlai Tomato Grower's Association-a tel hi chhungkaw 103 an awm mek a,

kumin kum tir lama tomato an chinte hralh tur la awm bawk mah se, kum tawp lama thar tur an phun chho leh mek a ni.

Chawngtlai khua hian nikum 2024 chhung khan tomato quintal 4672 an thar a, an tomato thar atang hian cheng nuai 57 zet an la lut a. Kumin 2025 chhung hian an tomato te tha taka an thar thei a ni chuan cheng nuai 80 man vel thar chhuah theih an inbeisei a ni.

<><><>

REVENUE DEPARTMENT

Land Revenue and Settlement Department Minister Pu B Lalchhanzova enkawl department chuan chak leh zuala hmalak an tum tih an sawi a, online hmangin mahni ram chin chiang taka en theih turin an buatsaih tih an sawi.

Pu B Lalchhanzova hian nimin khan Serchhip DC Meeting Hall-ah chanchinbu mite a kawm a, he hunah hian minister tawiawmtu Revenue Secretary Pu Vanlalmawia chuan Revenue inrelbawl dan chungchang sawi langin, tunlai thiamna hman tangkai an tum dan leh hma an lak mek dan te, chhiah (tax) pawh e-ram hmangin online a pek theih a nih thu te, digital land record an kalpui mekah GIS Mapping tih niin online in mahni ram chin chiang taka en theih a nih thuai tur thute a sawi. Secretary chuan Revenue Court System mumal awm lo pawh siam that tumin hma an la a, Revenue Court Manual siam mek a ni, a ti a. Ram buai chungchangah DC leh ADC te chu first appellate atan ruat an tum thu te a sawi bawk.

Minister tawiawmtu Supply Secretary Pi Teresy Vanlalhruaii pawhin Supply chungchanga an hmachhawp sawiin, ruahmanna fel tak siama mipuiin an nitin mamawh a hun tak leh dik taka an dawn theih nan hma an lak thu a sawi a. Retailer te hnenah buk dik taka buhfai leh a dangte an pe chhuak ngei tih hriat nan Supply Kudam tinah digital weighing scale dah a ni dawn a, August thla chhung hian khawl a lo thlen kim beisei a ni, a ti.

Supply Secretary chuan, sawrkar laipui duh dan angin Beneficiary zawng zawngte e-kyc tih fel vek tur a ni tih Supply Secretary chuan sawiin khaw tina VC te tanpui turin a sawm a; September 30 thleng chauh hun an neih tawh avang leh e-kyc tifel lo ten ration an dawn theih dawn loh avangin tan la turin a ngen a ni. Online-a ration card dilna siam an tum thu te, mipuiin thla tira ration an dawn theihna tura tan an lak dan te, Supply Minister hmalakna avanga kawng chhe karah pawh buhfai harsat thu hriat tur a awm loh thu te a sawi bawk.

<><><>

CITY BUS

Aizawl City Bus Owners' Association chuan tun hnai khan thuchhuah a siam a, August ni 18 atang chuan Durtlang (BSF Camp) atanga Ngaizel thleng tlan turin Bus pathum an tlan tir tawh dawn tih an sawi.

City Bus neitute leh Durtlang Joint Local Council te an inbiak hnuah thuchhuah hi siamin, sikul leh pisa kal lai bawrin Bus hran an nei dawn a, an Bus-ah hian Durtlang tih a intar dawn a, tlai lam hna thawk leh sikul naupang hawn lai bawrah pawh Bus tlan a tam theih nan hmalak a ni dawn tih an sawi bawk.

Tun hnai khan Durtlang atanga Bawngkawn pana tlan Bus hnungah sikul naupang eng emawzat an bet lai video chu social media-ah a darh a, sikul naupang ten motor chuanna tur an indaih lo tih a lang - Bus tlan thar tur hian an harsatna a sitkian theih sak a rinawm.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Naktuk zing dar 7 leh a chanve-ah Chanchinthar puan leh a ni ang.

<><><>

J&K CLOUDBURST

Jammu & Kashmir-a Ningani kaltaa ruah bawhawk sur vanga chhiatna thlenna, Kishtwar dist-a Chisoti khuaah sipai, NDRF, SDRF, Police leh tualchhung miten chhanchhuah leh chhawmdawl hna, ngawrh takin an thawk zel a, a tula hman mai theih turin Jammu leh Udhampur-ah Mi-17 helicopter pahnih leh Advanced Light Helicopter chhawp a ni bawk.

He chhiatna thlengah hian mi 60 an thih bakah midang 100 chuangin hliam an tuar a, mi engemawzat chin hriat lohvin an la awm bawk a ni.

Prime Minister Narendra Modi chuan state Chief Minister Omar Abdullah leh Larsap Manoj Sinha-te bia-in sorkar laipuiin a tul ang anga a tanpui tur thu a hrilh a, chhawmdawl hna chak taka thawk turin a chah bawk.

Chesoti khua hi nimin tlai khan Union Minister Jitendra Singh-a’n a tlawh a, wawiinah state Chief Minister Omar Abdullah-a’n a tlawh bawk a ni.

<><><>

PAKISTAN FLOODS

Pakistan ramchhung hmar lamah ruahsur nasa vanga tuilianah darkar 48 kalta chhung khan mi 321 an thi. He ram National Disaster Management Authority sawi danin, Khyber Pakhtunkhaw province-ah mi 307 an thi a, Pakistan Occupied Kashmir-ah mi 9, Gilgit Baltistan bialah mi 5 an thi bawk.

Met Dept chuan ruah tam tham tak a la sur thei tih sawiin mipuite chu fimkhur turin a chah a, province sorkar chuan Buner, Bajur, Swat, Shangla, Mansehra leh Battagram-te chu chhiatna thlenna hmunah a puang a ni.

Mi sang 2 rualin ruang zawn leh chhawmdawl hna an thawk tih Province rescue agency chuan a sawi.

<><><>

EAM THANKS S.KOREA

South Korea-in kumin April thlaa Pahalgam-a mifirfiakte chetna a dem avangin External Affairs Minister Dr. S. Jaishankar-a’n South Korea Foreign Affairs Minister, Cho Hyun-a hnenah lawmthu a hrilh.

Vawiin New Delhi-a Pu Hyun-a nena an inkawmnaah lawmthu hi a hrilh a, Korea National Liberation Day pualin duhsakna a hlan bawk a ni.

<><><>